

東
華
續
錄

東華續錄

嘉慶十四

臣王先謙敬編

臣周潤蕃恭校

秋七月辛未諭大學士王杰自乾隆辛巳年以廷對第一通籍供職詞垣入直南書房洊升卿貳 皇考高宗純皇帝知其持躬清介植品端方可資倚任是以鄉會試掄才大典及各省視學疊次簡畀持衡未經協辦大學士卽擢任輪扉贊襄樞務老成更事敷歷多年平定臺灣廓爾喀大功告成曾圖形紫光閣 賜贊褒嘉復 命充上書房總師傅朕在藩邸時曾資啓沃自親政以來時常召對恩禮有加見其年近八旬精神尙未衰減眷畀方殷茲以夏間屢嬰疾病具摺乞休朕念老成宿望未肯令其驟離左右當經召見再四慰留王杰以年衰氣弱深恐戀職誤公堅詞求

退情意懇誠在王杰並非家有田園思耽林泉之樂而朕眷懷者舊繩綬彌深豈忍愀然遽令歸去王杰著不必開大學士缺無庸票閱內閣本章其各館所纂書籍亦無庸閱看以便安心頤養如調理卽可就痊自應照舊供職儻一時未能卽愈自揣精力難勝再行陳奏另降諭旨○勒保奏殲除黃白青藍四號賊匪生擒首逆劉朝選得旨獎資晉一等男○甲戌諭內閣供事與各衙門書吏無異保甯甫經到京因考試供事外閒頗有浮言請在貢院局試經朕發交禮部議奏以貢院爲掄才重地考試吏胥於體制未合所議固是但議請欽派內閣學士及監試御史並護軍統領等員仍與考試士子相等辦理尙覺過當嗣後內閣供事仍在天安門外考試卽令稽查內閣之御史會同內閣承辦官員在彼監試其閱卷之內閣學士著大學士指派滿漢各一員臨期奏聞不必

請旨簡派○乙亥諭日前召見新授右翼總兵廣泰曾在朕前奏及步軍統領衙門一切事件並無章程必須另爲酌定復經召見又稱伊職係總兵本衙門司員俱存輕視之見朕卽覺其有意紛更欲占身分殊爲不滿自恨又誤用一人實屬不能知人深自愧赧本日召見祿康因將廣泰近日行爲面加詳詢據祿康奏稱廣泰自到任以來於公事每欲更張且以總兵究係武職閹署司員呼應不靈曾向祿康商懇代爲奏請加賞兵部侍郎虛銜等語當卽令軍機大臣傳詢廣泰竟係實有其事伊亦自認糊塗冒昧此非糊塗冒昧實屬膽大狂妄之至經軍機大臣奏請交部嚴議實屬咎所應得國家設官分職俱有定制豈有臣下妄思干請之理廣泰甫經擢用總兵自應循分盡職和衷共濟乃急於見長諸事輒欲紛更又復希冀加賞卿貳文銜紕繆乖戾已極廣泰著先行

解任仍交兵部嚴加議處速奏伊見在圍該班卽著逐回伊家閉門待罪聽候部議國霖卽著在圍該班此次不必隨從木蘭伊射布靶中箭三支應得例賞仍著賞給恭阿拉於都統內業經派出隨圍伊曾任總兵於步軍統領衙門事宜尙爲熟悉所有行圍管轄營員番役等事著恭阿拉暫行管理○丙子諭軍機大臣等台布奏蒙番情形並將蒙古呈遞各條進呈朕閱納漢達爾濟等所呈其意總欲內地官兵將番族痛加懲治殊不知足台布當明白曉諭以蒙古爲我朝臣僕雍正年間於青海設立辦事大臣隨時保護嗣因爾等不能自衛致有番子搶奪之事不值煩勞內地兵力 高宗純皇帝屢降 諭旨如再有番子搶奪等事總不能代伊等辦理仍重治其罪原欲爾等振作弗爲番族欺壓自大皇帝親政以來念爾游牧地方被番族搶占特派大臣帶兵前往諭令

番子將搶奪各物交還已屬格外天恩及番子出卡後爾等又不能自防復蒙大皇帝賞兵守護恩施稠疊無可復加今爾等偶有偷竊小事輒請天兵幫助實屬恃恩妄爲天朝統馭外藩甚多如厄魯特土爾扈特烏梁海等豈無偷竊之事從未請天朝發兵接捕何獨爾等頻頻煩瀆且番眾久隸帡幪從無干犯天朝之事爾等惟當嚴守疆界勉力自衛毋徒恃內地官兵爲爾捍禦亦不可與番眾有心構釁致啓爭端方不負大皇帝愛護之意若爾等不知自強惟思構兵滋事天朝不能相助並當治罪如此剴切曉諭俾蒙古等懷德畏威自不敢再行瀆請至添兵移卡諸事台布當酌量妥辦將此諭令知之○繼善緣事降調調移克登額爲盛京刑部侍郎以花尙阿爲盛京兵部侍郎由副都統遷○丁丑諭兵部議奏右翼總兵廣泰照違制例奏請革職一摺廣泰前任御史時曾

屢經派令巡漕看其人似能辦事疊加升用擢至卿員旋授內閣學士昨右翼總兵缺出將伊補授廣泰本係文職出身特因步軍統領衙門有審理事件伊或能通曉案牘可以幫同祿康辦事乃廣泰器小易盈於未經到任之先卽向祿康商懇代奏加賞兵部侍郎虛銜而於本衙門歷辦章程復有意紛更其實並未見別有籌辦之處不過圖占身分而已誠爲薄福小人試思祿康本係刑部尙書經朕簡任提督伊因刑部與步軍統領衙門有交涉事件再四辭退尙書朕當卽允其所請嗣因戶部尙書缺出復將祿康補授是祿康本係尙書並非因簡任提督俾兼部銜卽如從前歷任提督縣恩以親王管理和珅以大學士管理若如廣泰謬見則簡任提督者豈亦可引以爲例耶廣泰狂妄無知實屬紕繆乖戾著卽照部議革職○諭琅玕奏樹苗通甸小川各路官兵連獲勝

仗見在合兵進剿吉尼覽奏俱悉獐獐夷匪經此懲創自必畏懼
惟恆乍棚一犯逃匿江外伊係起事首逆必當擒拏務獲勿令漏
網至摺內稱秋深瘴退如有仍須剿辦之處再行奏辦該匪等見
已逃出江外若秋深後竟敢渡江滋擾自應剿辦儻畏懼不出卽
可不煩師旅該夷人賦性兇頑劫掠是其長技遇有滋事之時自
當隨案懲創至既經懾伏之後卽兵力有餘亦斷無將此種夷人
誅戮務盡之理窮兵黷武非善政亦何忍殘害無知之夷人邀功
見好耶琅玕當查明爲首之楊金羅小二實在下落懾以兵威勒
令該夷人速將二犯縛獻卽可完事無庸過江投剿務欲邀功至
不可罷兵之時轉成蛇足矣○己卯廣西巡撫謝啓昆卒子祭葬
賞銀三千兩治喪○以孫玉庭爲廣西巡撫同興署湖北布政使

候補布

政使○庚辰以明志爲內閣學士

由奉天府尹遷

○調喬人傑爲湖

北按察使成甯爲福建按察使○辛巳諭朕惟求治之道必期明目達聰廣爲諮諏庶民隱得以周知古帝王縣鞬設鐸自臣工以逮士庶悉令各陳所蘊以備採納但必視其言之有當與否如果指陳確實有裨國是卽無言職者亦當加之採錄儻率逞臆見妄意紛更甚至莠言亂政雖係言官之言亦豈可輕爲聽用近來科道中每有條奏失當經朕降旨駁斥此係權衡事理隨事訓飭並非懶於辦事怠情偷安朕承 皇考付託曷敢不勤政乎若言官誤會朕旨遂爾相率緘默轉非朕廣開言路之意矣本日據步軍統領衙門呈遞陝西恩貢生加捐州同職銜何泰條奏一件朕詳加披閱其所陳敬天勤民敦崇治本激發官方整飭士習以及黜奢崇儉挽回風化各大端俱能援引古書切陳時事其中不無可採何泰係恩貢出身加捐州同職銜非齊民可比伊果有志上進

於鄉會試中式後原可臨軒試策直陳無隱今抒陳各款於風俗
人心均有關係且文理亦屬通順著加恩賞給大段二匹交祿庫
將伊傳到祇領並諭何泰回家安靜讀書勉圖進取以備將來量
材錄用所有原遞各條留備省覽○增設陝西漢中府屬分防漁
渡路撫民同知司獄簡池壩巡檢洋縣縣丞四畝地巡檢各一○
癸未諭額勒登保等奏請將固原陝安提鎮仍因舊制並另籌漢
南添設營汛各事宜一摺國家設立督撫提鎮原擇扼要適中之
地駐紮以資控馭而垂永久不可因目前情形稍涉緊要遽議更
張前長麟等請將固原提督移駐漢中經兵部議准此止係一時
權宜並未計及久遠朕意此事所關甚重原欲降旨不改舊制今
額勒登保等以見在漢中地方雖較固原爲緊要若大功告竣後
所應辦者不過盤緝奸宄等事非若固原之防範邊陲彈壓番族

者可比所見甚，是著照所請。固原提督無須移駐漢中，紛更營制至向例，每三年提督至興安漢中巡閱一次，爲期太遠。該處萬山叢雜，地方遼闊，奸民最易藏匿，必須常有大員往來稽查，方足以資鎮撫。見在海疆提鎮卽有每年出洋會哨之例，嗣後陝安鎮協及甯陝鎮俱著該提督每年巡查一次。餘著該部覈議具奏。尋議西鄉縣添設游擊一守備一千總二把總三外委四爲西鄉營移白土關都司駐鎮坪爲鎮坪營歸陝安鎮轄。沔縣添設都司一千總一把總二外委二爲沔縣營。南鄭屬之鋼廠添設守備一千總一外委二爲鋼廠營。歸漢中協轄。陽平關添設外委一。略陽營添設把總一撥兵防守從之。○撥河南藩庫銀二十萬兩備陝西善後事宜。○甲申允大學士王杰致仕加太子太傅在籍食俸。○以邱庭瀝爲廣東按察使。由杜○丙戌諭軍機大臣等清安泰奏安

南阮藩被農耐侵偏欲叩關投納想吉慶接到稟報自必馳赴鎮南關督辦一切見在清安泰已奏明前往茲又諭令孫玉庭速赴廣西會同妥辦如阮光纘率屬內投卽應照從前黎維祁之例妥爲安置僅籲請助兵吉慶應據實奏聞候旨至農耐知阮光纘入關或指名求索僅敢稱兵境上自不可稍爲容貸若情詞恭順亦當馳奏朕再爲區處吉慶當熟籌妥辦並於各關隘飭屬嚴防不可示外夷以弱如孫玉庭已到卽令清安泰回省理事○戊子

上啓鑾秋獮木蘭○免經過地方額賦十分之五○癸巳諭朕前聞廣東博羅縣有重犯越獄知縣劉嘉穎不行詳報臬司陳文及該管知府扶同徇隱復告知藩司將該縣典史調補煙瘴示罰又粵東贓罰銀兩按縣攤派批解臬司作爲陋規吳俊在任時曾經收受升任起程時又派此項以作路費等事當經親書密諭令吉

廣瑚圖禮密查具奏朕以此事尙屬風聞虛實未定茲據吉慶等查明覆奏皆係實有其事將藩司府縣等分別參革並自請嚴議前來披閱之下殊堪感歎更深懷畏各直省設立督撫原以糾察屬吏惟在見聞周密有弊必除庶屬員等知所儆懼吏治自臻整肅若必待朕先有所聞降旨詢問督撫始行查辦則安用督撫爲耶試思四海之廣臣民之衆爲人君者安能一一周知雖以堯舜之君明目達聰設無九官十二牧爲之分職亮功亦何能從欲以治乎今粵東吏治苦此而吉慶瑚圖禮竟懵然不知直至朕指出情節嚴切密詢伊二人始訪查得實以此類推則各省似此通同舞弊之事或更有大於此者未經朕聞知查詢因循不辦又不知凡幾矣知人之明用人之難朕實愧且懼惟盡此求治之苦心耳至外省一切陋規早應隨時禁革粵東借贓罰爲名按缺派送銀

兩相沿已久督撫並不查辦一經朕詢問始據實陳奏可見此等陋規未經革除者尙復不少今既經發覺卽不能置之不辦所有博羅縣絞犯越獄一案知縣劉嘉穎私稟臬司匿不詳報竟敢有意消弭情殊可惡今案犯業已拏獲姑著照所擬革職發往伊犁效力贖罪典史李清係管獄官並不小心防範以致要犯脫逃亦著革職發往軍臺效力贖罪惠州府知府伊秉綬係親臨上司任聽該縣匿報不行揭參著革職惠潮嘉道胡克家於所屬越獄重案不行揭報著交部嚴加議處藩司常齡經陳文告知此案並不照例揭參輒將該典史改調煙瘴地方調停其實屬膽大妄爲著先革去頂帶仍交部嚴加議處臬司陳文於路過惠州時該縣已將監犯越獄之事面稟陳文並不揭參亦未令其通稟且經收受贓罰銀兩陳文前因年老難勝臬司之任已令來京候旨卽著

革職交部審訊治罪見在行抵何處著該省督撫派員管押來京
升任山東藩司吳俊於廣東臬司任內既經得受贓罰銀兩起程
時又復將此項作爲路費實屬卑鄙亦著革職令祖之望委員管
押來京交刑部審訊治罪吉慶瑚圖禮於所屬匿報重案及收受
陋規漫無覺察直同木偶均著交部嚴加議處嗣後各督撫於地
方吏治務當隨時訪察釐剔弊端如有作奸犯科之事卽當據實
嚴參不得徇情袒庇亦不可爲屬員蒙蔽以期大法小廉副朕徵
敘官方至意○甲午上駐蹕避暑山莊○諭本日至避暑山莊
甫經下馬適遇到額勒登保等六百里加緊奏報官兵殲獲首逆
苟文明並擒斬餘黨大喜捷音此皆上天垂恩皇考賜佑欣
慰之餘翻增感涕秋禱大典爲我朝家法相傳所以肄武習勞
懷柔藩部者意至深遠我皇考臨御六十餘年於木蘭行園之

先 駐蹕避暑山莊歲以爲常 敕幾勤政之暇款洽蒙古外藩
垂爲令典是避暑山莊實爲 皇祖 皇考在天靈爽式憑之地
朕祗承 鴻緒不敢稍自暇逸特於今秋涓吉啓鑾舉行秋獮實
本繼 志之誠若以山莊爲從事游覽則京師官館池籞豈不較
此閒更爲清適而必跋涉道途衝履泥淖遠臨駐蹕乎朕之敬遵
成法不敢偷安必欲前來山莊之忱悃 皇考實鑒臨之是以
清蹕纔停捷書已至 眷佑所昭如響斯應朕披覽奏函瞻依
居處不覺聲淚俱下召見軍機大臣時至於哽咽不能宣旨此實
至情所感不能自已當命將此摺徧示內外王公滿漢諸臣亦莫
不額手稱慶彼止朕此行之漢員適見其愚情不曉事耳至苟文
明爲積久著名首逆與羅其清冉文儔等一同起事頻年以來在
川陝楚三省地方展轉奔逃肆意擄掠實爲罪大惡極經額勒登

保督率官兵屢次勦殺勢極窮蹙而向於大山密林內潛匿四竄
希圖免脫又復數月今在花石巖地方經官兵四路按偏立時截
斃斬級梟示並餘匪盡數殲除皆由額勒登保調度得宜所致雖
辦理稍覺遲延而首逆終就殄滅實不愧經略之任殊屬可嘉邪
教起事各首逆俱已陸續辦淨止餘苟文明一犯今該逆復經殲
斃是積年著名巨惡業已悉數掃蕩其零星奔竄之蒲添寶等止
係近日攢聚殘匪爲首之犯且爲數無多見有參贊德榜泰等督
兵按捕獲功大局已得十之九額勒登保著加恩晉封一等伯賞
還雙眼花翎俟陝省零匪全數肅清再加恩資提督楊遇春雖係
事後趕到而督率按勦亦屬勤奮著交部議敘其奮勇出力殊筆
圈出之李應貴張廷楷吳廷剛李應元特依順保張超王兆龍祝
廷彪黎炳謝天瑞丁永安張必祿藍翎馬兵楊貴等或應加升一

等或應交部議敘或應賞戴翎支著額勒登保等分別等第開單保奏其餘如何有出力人員亦著一併查明具奏候旨加恩並發去青玉搬指十箇鼻煙壺十箇大荷包五對小荷包十對分賞出力員弁一兩重銀牌二百面五錢重銀牌二百面分賞出力兵勇以示獎勵將此通諭知之○諭山東金鄉縣阜孫冒考一案前經學政劉鳳誥參奏降旨交和甯秉公審辦乃三月之久尙未審結旋據給事中汪鏞參奏承審此案官員將原告刑偏認誣並據武生李長清在都察院衙門控告交刑部訊問錄供具奏朕以此案劉鳳誥參奏於前今該省地方官挾私偏聽該學政豈無見聞諭令據實查奏茲據劉鳳誥覆奏此案金鄉縣阜孫張敬禮等冒考經李玉燦以揭及舉人王朝駒等呈控該學政按試兗州訪問該處生童僉稱是實且乾隆七年二十年張姓子孫冒考曾有兩次

斷逐舊案控詞底稟見存呈驗乃承審官有心黨庇並不追究被
告人證轉將原告刑求挫辱誘令將呈稟毀滅盛暑咎箠並株連
鄉民紳士械繫多人眾心飲泣士論沸騰且以奉旨解任之知縣
汪廷楷不行質審竟令其借捕蝗爲名回縣協同署任提拏人證
報復按求尤堪駭異除此案已交祖之望等秉公嚴審外和甯自
任山東巡撫聞其在署日以文墨爲事於屬員亦不輕易接見朕
卽恐其於地方不無廢弛今以奉旨特交事件並不親提審訊一
聽委員偏袒徇私任情誣枉伊若罔聞知直同本偶卽此一節已
不勝巡撫之任和甯著卽解任來京候旨所有山東巡撫員缺著
祖之望補授○諭姜晟前在直隸總督任內爲日未久上年永定
河決口因雨水盛漲人力難施初非有心疏玩而積年辦工貽誤
並非始自姜晟其咎尙屬可原且伊前任湖南巡撫時經理苗疆

事宜頗爲妥協前經賞給刑部主事旋以員外郎升用今祖之望已授山東巡撫所有刑部左侍郎員缺著初彭齡轉補姜晟著加恩賞給四品頂帶補授刑部右侍郎○諭倭什布前在湖北督撫任內經額勒登保德楞泰參奏辦理糧餉遲誤革職拏問交軍機大臣會同刑部審擬嗣經審明倭什布在湖北亦係親身帶兵非專辦糧餉之員其軍營糧餉偶有缺乏止因經理不善並非有心玩誤量擬發往軍臺效力經朕加恩賞給筆帖式發往陝西當差念伊前任陝西藩司時官聲尙好倭什布著加恩賞給四品頂帶補授山東布政使卽來京請訓再赴新任其未到任以前山東布政使印務著陳鍾琛署理所遺按察使印務著崔映辰署理○擢康基田爲廣東布政使

由江蘇太倉州知州遷

○乙未諭軍機大臣等清安

泰奏接據太平府知府王撫棠等稟報農耐阮種攻打昇隆城阮

光續敗走被獲阮種入城自立等語邊關緊要吉慶孫玉庭應查看情形督率文武各員小心防守至外夷自相吞噬與內地無涉不必過問如阮種有納款之事或另有別意再行奏聞請旨○丙申勒保奏迎勦楚省竄匪斃首逆賴先鋒撲滅全股並兜截張長青一股得旨獎賚○丁酉刑部尙書張若淳卒贈太子少保賜祭葬諡勤恪○以熊枚爲刑部尙書調汪承霈爲左都御史以戴衢亨爲兵部尙書轉平恕爲戶部左侍郎調錢樾爲戶部右侍郎轉曹城爲吏部左侍郎調李鈞簡爲吏部右侍郎轉劉鏞之爲兵部左侍郎調潘世恩爲兵部右侍郎以關槐爲禮部右侍郎由內閣學士遷○八月己亥朔日有食之○以日月薄蝕詔求諱言○庚子禮部議覆御史秦維嶽條奏嗣後拔貢朝考請定日月均勻定額等語查各省拔貢到京先後不一應如所奏嗣後朝考之年定於五月三

十截數六月初旬考試庶各省均知試期同時到京不至有守候遲誤之累至錄取數目係考選引見臨時、欽定所奏毋庸議從之○以戶部尙書朱珪協辦大學士加太子少保○撥河南藩庫銀三十萬兩兩淮運庫銀二十萬兩備湖北軍需○辛丑諭常齡於博羅縣絞犯越獄重案既經臬司陳文告知並不據實揭參已屬徇庇復擅將該典史改調煙瘴調停其事實屬膽大妄爲著卽照部議革職吉慶瑚圖禮於臬司借贓罰爲名收受陋規及博羅縣重犯越獄匿案不報俱不參辦直至降旨詢問始行陳奏均屬徇庇吏部議以革任實降皆咎所應得姑念海疆重地一時未便全易生手吉慶從寬免其革任仍註冊瑚圖禮著從寬改爲革職留任至惠潮道胡克家於所屬越獄之案未經揭報咎止失察亦著從寬改爲革職留任○癸卯王秉翰卒以嵇承志署河東河道

總督

由長蘆鹽運使署

○諭軍機大臣等吉慶奏農耐遣使恭進表貢並

縛送莫觀扶等三犯來粵正法各情形覽奏俱悉從前阮光平款

關內附極爲恭順我皇考鑒其忱悃錫以封土阮光平感被

殊榮躬親詣闕皇考恩禮有加駢蕃錫賚原以阮光平克矢畏

懷始得仰承寵遇迨阮光纘嗣服交南復頒敕命俾其世守

勿替乃近年以來閩粵二省洋面盜船內閒有長髮之人聞係該

國縱令出洋行劫朕未肯輕信尙以長髮匪徒或係該國貧民隨

盜入夥曾降旨諭令查拏總未見擒獻一人今阮福映縛致莫觀

扶等三犯訊取供詞均係內地盜犯該國招往投順封爲東海王

及總兵等僞職仍令至內洋行劫商旅是阮光纘不但不遵旨查

拏而且窩納叛亡寵以官職肆毒海洋負恩反噬莫此爲甚至敕

書印信頒自天朝名器至重尤當敬謹護守與國存亡乃阮光纘

不知慎重於阮福映上年攻取富春時輒行捨棄潛逃罪無可追至阮福映此次使臣吉慶當諭以爾國長恭進表內所敘情節業經轉奏蒙大皇帝俯察爾國恭順之誠深爲嘉獎阮光平臣事天朝先大皇帝錫之敕命恩賚優加乃其子阮光纘竟敢窩留內地盜犯通同劫掠喪心背恩實爲天理所不容是以亡不旋踵今棄國潛逃並天朝所給敕印亦不能守是阮光纘不特上負先大皇帝怙冒洪慈抑且爲阮光平不孝之子獲罪甚重爾國長遣使恭繳敕印並縛獻逋盜深得事大之禮恭進表貢具見至誠但天朝每遇外洋諸國遭風船隻無不一視同仁給貲安送從無因此遽納貢獻之事且爾國長邦家未定並非素備藩封揆之體制尙不應在職貢之列爾可卽齎回轉向爾等國長告知如此明白檄諭方爲得體其所繳敕印著吉慶暫爲收貯再前據清安

奏奏阮光纘爲阮種所獲阮種是否卽係阮福映未據聲敘本日
吉慶摺內稱農耐使臣起程尙在阮光纘被獲之前是以未得此
信前次諭令吉慶等如阮光纘率屬內投妥爲安置今伊罪狀昭
著實無足惜若敬闕求納吉慶當將阮福映繳來敕印並盜犯莫
觀扶等供詞令其閱看面加詰責後傳旨革去王爵卽於該處監
禁候旨定奪儻阮光纘已爲阮福映所獲阮福映不敢自尊將伊
解送鎮南關亦當照此辦理其莫觀扶等三犯俱照大逆律辦理
如各犯家屬有應緣坐者一體查辦此時吉慶當遵前旨迅赴鎮
南關勒兵防守持以鎮靜俟阮福映攻得安南全境遣使請封或
得阮光纘實在下落再行奏聞候旨○乙巳撥安徽米四萬石湖
南米三萬石河南小米二萬石備湖北軍糈○丁未諭額勒登保
所封一等伯爵著仍用威勇名號照例承襲○己酉諭本年春間

常明參奏道員孫文煥濫用軍需蒙混灑銷一案降旨令百齡會同張長庚確審實情稟明琅玕定擬具奏嗣經孫曰秉奏到孫文煥差人呈控藩司百齡勒派贍徇捏飾欺罔各款並將原呈進呈當派初彭齡富尼善前往秉公查辦茲據初彭齡富尼善奏到審訊大槩情形請將巡撫常明臬司張長庚貴西道呂雲棟候補道員馮克鞏一併革職嚴審等語詳閱摺內所敘情節孫文煥所控百齡假公勒索等款經初彭齡等傳齊人證反復究詰均屬虛誣而巡撫常明久任黔藩將軍需款項牽混支抵於應撥鉛廠銀兩延宕未繳又將軍需用贍鉛九十四萬餘斤交商鎔化令幕友金玉堂私賣並任聽抽匿報銷卷案各款業據初彭齡等質審屬實常明之罪已無可追而此內私賣鉛斤一節情罪尤重此項鉛九既經軍營用贍自應歸入軍需項下報銷乃既不奏明又未報部

輒因幕友金玉堂向來販賣白鉛竟將鉛九鎔作鉛斤與伊合夥運往漢口發賣希圖漁利迨至藩司百齡查知常明始應允照數買還飭法營私行同市僧且於軍需報銷要案漫不檢查任聽幕友私自抽匿亦難保無侵冒情弊竟不料其負國至於如此常明著革職交初彭齡等嚴審定擬具奏一併查鈔任所家產其所賣鉛斤曾否照數買還或將價銀交官抑係私行入己之處並著查明覆奏臬司張長庚於署藩司時接收常明交代並未清釐又聽從移藏案卷顯有受屬蒙混情弊張長庚亦著革職治罪貴西道呂雲棟於常明應撥鉛廠銀兩代爲擔認候補道員馮克鞏見據孫文煥供稱濫應提賞銀兩係與馮克鞏同在餉局經手呂雲棟馮克鞏均著革職交初彭齡一併歸案審辦至藩司百齡於孫文煥所控各款雖審屬全虛但百齡既經查出常明欠繳庫項並縱

令劣幕私賣鉛斤各款不卽據實參奏僅以催追押繳完結意存
瞻顧巡撫以致孫文煥心懷不甘捏詞呈控實屬有心袒庇百齡
業經解任並令初彭齡等於定案時治以徇隱之罪至已革道員
孫文煥著遵照前旨歸案按律定擬具奏○諭向例蒙古會盟齊
集原係特派大員一同辦理嗣 皇考因派員恐有擾累 特旨
停止今蘊端多爾濟以近年事多叢脞仍請遇有喀爾喀四部落
會盟比丁之年一切應辦事宜會同烏里雅蘇台將軍等辦理尙
屬可行著照所請賽因諾顏扎薩克圖汗二部落事務卽就近在
烏里雅蘇台會集與定邊左副將軍一同辦理土謝圖汗車臣汗
二部落事務卽就近在庫倫會集與辦事大臣一同辦理○諭俄
羅斯交界四十七處卡倫向來未定巡查之例今蘊端多爾濟奏
稱明年四月親查恰克圖西十九處卡倫後年再查恰克圖東二

十八處卡倫逾十年與庫倫辦事大臣輪流一次往查亦屬嚴肅
邊界之意著照所請行但俄羅斯人等多疑著蘊端多爾濟於巡
查卡倫以前明白曉諭使俄羅斯固畢爾納托爾等知巡查原欲
永清二處交界並無別故自不至心生疑懼也○撥河南藩庫銀
三十四萬兩浙江藩庫銀二十六萬兩廣東藩庫銀四十萬兩備
陝西軍需○以富尼善爲貴州巡撫由副都統遷○調董教增爲貴州

按察使以劉清爲四川按察使

由建昌道遷

○乙卯

上自避暑山莊

巡幸木蘭行圍○戊午 上射麇二○辛酉諭軍機大臣等德楞
泰奏勦除蒲添寶大股已降旨加恩矣其所稱吉林泰一路在歸
州水田壩有賊眾偷撲營盤力擊始退查係熊方青熊翠股匪六
七百人等語是此股零匪較爲緊要德楞泰當移兵前往或揀派
鎮將帶兵幫同追勦以期辦淨又楚省大股已除零匪不難迅速

掃盡此事原自楚始必自楚成目下當喫緊之際糧運係該督專責吳熊光當安速供運勿稍缺乏○德楞泰奏殲斃蒲添寶擒斬藍黃白三號賊目多名得旨獎資○壬戌以王懿修爲內閣學士

由光祿寺卿遷

○乙丑諭祖之望等奏審明金鄉縣阜孫冒考一案分別

定擬一摺此案係朕特降諭旨交與和甯審辦之案和甯並不親提研鞫一任承審之員徇私將原告刑求挫辱以致株累多人況據祖之望等奏稱候補同知張繼榮承審此案時將原告李玉璨掌責藩司面加呵斥伊卽告病追銷假時稟見巡撫和甯亦曾斥其鍛鍊臬司亦加抱怨等語是張繼榮刑訊原告偏令誣認和甯等既知其鍛鍊卽當將該員參奏親提鞫訊乃仍聽委員等始終蒙蔽竟若罔聞豈非有心袒護至飛蝗入境一事經朕節降諭旨飭令詳查而和甯止稱濟甯等州縣聞有飛蝗並不食稼封

疆大吏諱災不報實屬玩視民瘼前經吏部議奏將和甯照溺職
例革職實爲咎所應得和甯著照部議革職藩司吳俊除已另案
革職外臬司陳鍾琛職任刑名未經秉公督辦著交部嚴加議處
餘著交刑部覈議具奏○戊辰增設圍場副都統駐紮唐三營裁
總管一

九月己巳朔實授顏檢直隸總督○癸酉廣東博羅縣會匪滋事
命吉慶勦之○甲戌定蒙古留孤養親例○丙子 上駐蹕避暑
山莊○丁丑富尼善卒以福慶爲貴州巡撫阿林保爲安徽布政
使調李亨特爲江蘇按察使以韓封爲湖南按察使由岳常禮道遷○以
百齡仍署貴州布政使○庚辰 上自避暑山莊回鑾○諭刑部
題覆安徽省民人孫登扎傷胞兄孫梅餘限外身死夾籤聲請一
本見已依擬將該犯著卽處絞矣向來尋常刃傷各案如在保辜

正餘限外身死者止科傷罪至有關服制之案雖與尋常刃傷案犯不同但限內限外究當示以區別嗣後遇有卑幼刃傷期親尊長如在保辜正餘限內身死者仍照舊辦理外若死在餘限之外卽照刃傷本律問擬絞決其刃傷期親尊長尊屬律應問擬絞決之犯如訊非有心干犯或係金刃誤傷及情有可憫者俱著問擬絞候均無庸夾鐵聲請著刑部纂入例冊遵行○丁亥以江西水旱災撥兩淮倉穀十萬石備糶○戊子 上謁 昭西陵 孝陵之二○辛卯 上還京師○廣東博羅縣會匪平總督吉慶得旨獎資○丙申吳熊光奏興山縣寨勇殲斃黃號首逆唐明萬得旨嘉獎○免雲南獐匪滋擾之維西等二十二縣州縣額賦○丁酉諭向來內閣呈進本章凡遇禮部太常寺等衙門具題之件有關

壇 廟典禮者奏事處進呈時敬列於是日各本章之前並豫
備盥洗候朕浣手敬謹披閱至每日批覽奏摺奏事處先將外省
所選奏摺呈閱後始將各部院衙門事件以次進呈此內有關緊
大祀典禮者亦一律照常呈進殊不足以彰誠敬嗣後禮部太
常寺及各衙門具奏事件除封奏照常呈進外其恭遇 天 地
祖 宗大祀各項典禮儀注或奏摺及緣頭牌內有稱述 尊
號之處本係露封陳奏者奏事處即應照進本之例先行呈遞敬
候披閱以昭慎重○改定四川綏定府等屬教授教諭訓導官並
生童學額裁保縣教諭茂州汶水訓導

冬十月癸卯諭本日據吉慶馳奏將博羅縣結會滋事之首惡陳
燭殿四擒獲凌遲正法餘匪即就肅清已明降諭旨宣示矣陳燭
殿四在博羅地方製造兵械旗幟占據山險恃爲巢穴糾眾多至

萬餘其蓄謀已非一日且該犯之父陳士莊係捐納按察司照磨
可見家道尙屬殷裕並非迫於飢寒爲結會斂錢之計竟係有心
謀爲不軌該地方官若能乘其甫經糾集人數未多將一二爲首
之犯設法緝拏按律懲治其餘黨自必聞風解散可期立即消弭
卽地方官失察之咎亦不過照例參處所保全者何限乃外省積
習遇有此等匪徒並不早爲懲辦又或存化大爲小之見豫爲屬
員規避處分總欲袒庇不肖州縣而忍陷無辜小民於水火鋒鏑
遂致日久因循匪黨無所畏懼四出焚掠附近村庄旣遭荼毒追
逆蹟旣彰勢不得不懾以兵威加之誅戮其臨陣殲斃及擒捕正
法者動輒數千可見平時之姑息養奸必致釀成巨案所傷人命
轉多卽以世俗陰功之說而言孰輕孰重亦不辨自明矣著傳諭
各督撫嗣後應嚴飭地方官平日務當留心化導俾無知小民皆

知安分畏法如或有不肖匪徒倡謀滋事或小有搶掠或造作逆詞該州縣一有風聞卽當趁其未經蠢動之初將爲首者上緊緝拏立時辦竣毋任彼此勾結致啓事端卽如博羅一案幸該匪等尙未肆竄蔓延得以剋期捕獲然已殲戮多人同案抵罪者亦復不少雖頑民自作不靖而朕心良用惻然該督撫等惟當勉思撫馭禁暴戢奸勿俾苞槩潛滋以副朕諄諄教誡至意○丙午撥兩淮鹽運銀二十二萬兩浙江運庫銀二十八萬兩備湖北湖南軍需○辛亥禁番役子孫出仕應試○壬子勒保奏擒獲白號賊首張簡○甲寅以湖廣總督吳熊光兼署湖北提督○乙卯申禁軍營賞項入軍需報銷○勒保奏殲除白號餘匪擒獲藍號賊首湯思蛟得旨嘉獎○丙辰除古北口抽分歲額○丁巳德楞泰奏殲斃白號賊首敦四生擒賊目趙鑑得旨獎賚○撥兩淮巡庫銀二

十萬兩粵海關稅銀二十萬兩備四川軍需○己未諭軍機大臣等吉慶奏博羅匪徒曾鬼六句結永安匪徒數千人抗拒官兵等語曾鬼六等犯是否係陳爛展四餘黨何以甫經句結卽有數千人之多此時該督已馳赴該處勦辦提督孫全謀亦已帶兵馳往又恐兵力不敷飛調江西兵二千名太覺張皇失措矣昨據書敬奏曾豫備滿兵一千二百名何不卽行調往乃舍近圖遠轉於相隔千餘里之贛州調兵來惠江西兵素非趨健卽到粵亦不能得力何吉慶一無籌畫竟至於此著傳旨申飭至因帶兵乏人請簡派副將參遊都守等十員前往亦屬緩不濟急吉慶總當胸持定見不可過於張皇亦不可稍有遲延爲要○辛酉賜李白玉等六人武進士及第出身有差○壬戌諭軍機大臣等英善奏廓爾喀王吉爾巴納租塔畢噶爾瑪薩野呈進例貢另片稱風聞披楞

之兵已將廓爾喀部落侵奪六處恐該國王勢窮仰仗天朝威力
或奔投唐古特境內等語該國王此次遣使進貢或卽爲將來地
步但此等蠻觸相爭竟可不必過問儻乞兵相救英善等惟當請
旨遵辦若情急來投斷不可遽令入境惟令其在唐古特境內暫
行停頓一面迅速奏請訓示○甲子召孫日秉來京以初彭齡署
雲南巡撫百齡護理貴州巡撫由署布政使護理○丙寅普福卒以恭阿
拉爲左都御史由都統遷○丁卯封巴革克勤郡王恆謹爲不入八分
輔國公

十一月戊辰朔德楞泰奏殲擒首逆陳侍學等得旨獎賚○庚午
諭吉慶辦理博羅會匪一案節次奏報種種張皇冒昧糊塗草率
不勝協贊綸扉之任吉慶著革去協辦大學士仍著留兩廣總督
以觀後效○諭軍機大臣等見派那彥成馳赴粵東有密查事件

那彥成接奉後卽迅速前往所有江西查審之案交姜晟一人辦理又諭粵東歸善縣添弟會滋事一案先於八月二十二日吉慶奏到拏獲首夥四十餘名投出者一百九十餘名地方業已甯謐二十九日奏摺內忽稱歸善博羅共有會匪一二萬人此二摺情形互異嗣後所奏各摺如所稱東莞增城龍門等處均有匪徒繼復添入河源歸善石龍三處而瑚圖禮所奏東莞等六處並無會匪及至攻克羊矢山羅溪營賊巢據稱賊匪萬餘擒斬者三千餘人其餘賊匪並未聲明竄往何處迨攻克羅浮山拏獲首逆陳爛展四後突於十月二十一日奏到博羅匪徒曾鬼六句結永安匪曾清浩官粵壠等數千人而二十七日奏摺止稱曾清浩等糾夥數百人本日奏到摺內又稱曾清浩率夥投出四千餘人官粵壠賴東保兩起尙有二三千人且於曾鬼六一犯並未提及所稱賴

東保一起前奏未見其名種種歧異不一而足那彥成抵粵後卽將指出吉慶陳奏不符之處密爲查訪此案究竟因何處起釁是否吉慶濫殺激變據實直陳○莊靜固倫公主下嫁土默特貝子額駙瑪呢巴達喇○陸有仁卒調祖之望爲陝西巡撫以倭什布爲山東巡撫陳鍾琛爲山東布政使金光悌爲山東按察使內侍○讀學○甲戌諭軍機大臣等本日烏大經奏稱獐匪經官兵屢次痛勦後業已畏懼乞降其首逆恒乍糊逃匿江外亦不難設法弋擒並留兵二千名分派將弁沿江防堵自應布置周密何至又有渡江滋擾之事該匪等渡過之處係何江岸何人汛地著琅玕卽查明參奏獐匪係邊外野夷似此反覆無常皆不畏死若不大加懲創何所忌憚著琅玕等卽將前此奏撤各兵截回迅速勦辦俾知畏懾至此大渡江賊匪自仍係恒乍糊往來句結正可乘其過

江設法技擒若將該首逆擒獲餘匪望風奔潰自不難迅就蕝事
○丙子勒保奏生擒黃號賊首唐明萬得旨獎資○巳卯額勒登
保奏截勦川界竄匪生擒首逆葉二得旨嘉獎○壬午諭興肇等
奏稱此次和闐採辦白玉二十七斤次白玉二十四斤各一塊請
將回子伯克伊斯瑪伊勒愛瑪爾和卓二人賞戴花翎回子愛瑪
沙等七人賞戴翎頂等語所奏殊屬非是和闐爲產玉之區該處
伯克等率領回民撈採玉石每年解運至京止係任土作貢之意
今興肇等因伊斯瑪伊勒等採獲白玉二塊斤數較重輒請賞給
翎頂此玉有何足貴翎支頂帶爲國家名器所關該伯克及回子
等如果奮勉勤能於防卡屯田一切差使辦理妥協該大臣等據
實奏聞必照所請加恩用示獎勵豈得以採獲玉斤較重遂爲伊
等之功濫行懇請乎朕數年以來節節降旨停止中外臣工貢獻

凡金玉珠寶等物概不准呈進前葉爾羌採得數百斤成塊大玉業已運送起程曾降旨卽於所至地方截留棄置興肇等甯不知之況此區區數十斤之玉塊又何足爲貴乎朕所寶者惟在時和年豐民安物阜一切耳目玩好之物素性實所鄙棄若如興肇等所奏獲一玉塊卽錫以翎頂之榮則伯克回子等勢必爭相慕效專以搜採大玉希冀邀榮而外間無識之徒或因此妄生揣摩此則甚有關繫興肇額勒金布均著傳旨嚴行申飭其所請賞給翎頂之伊斯瑪伊勒等俱不准賞給並著曉諭各伯克回子等嗣後惟當實力當差如有出力之處該大臣等奏聞時必當加恩賞賚至此次該回子因未得大玉誦經祈求此語如果屬實更覺無謂豈採得大玉卽爲伊等報效乎所有見獲大玉二塊如可趁例貢之便送京方准其附帶若沿途運送稍有不便卽擲於該處不必

呈進將此通諭知之○甲申 上臨莊敬和碩公主第○丙戌額勒登保奏追剿黃藍綬等號賊匪生擒首逆景英等得旨獎賚晉封三等侯擢乾清門侍衛穆克登布爲御前侍衛賞騎都尉世職○己丑諭惠齡奏連日督率官兵搜捕零匪節有斬獲一摺昨因惠齡督剿南山餘匪並不實力起辦當降旨嚴行申飭本日奏到摺內又僅稱楊芳李應貴等帶兵分投追捕殺賊均屬無幾餘匪仍復潛匿山內總不能一律搜剿淨盡似此因循怠玩陝境山內勦贖零匪何日始能肅清耶惠齡係陝甘總督所有南山餘匪乃專交伊接手督辦詎自經略離陝以後節次奏報之摺止稱殲擒賊匪或三五人或一二十人任聽零星散匪肆行逃竄該督毫無布置惟以嚴催並不勝焦急等語鋪敘塞責看來惠齡竟不肯實心任事惟據將領等稟報入奏不但不能親履行陣並不能調度

合宜仍係伊從前在軍營蒼滑伎倆實屬有負委任惠齡著拔去
花翎降爲二品頂帶暫留陝甘總督之任以觀後效○庚寅諭吉
慶辦理博羅會匪一事節次奏報張皇冒昧草率糊塗前已降旨
革退協辦大學士本日奏報永安全境平甯一摺聲敘仍不明晰
據稱勦獲賊匪甚多並未奏明人數投首匪眾亦無名姓供辭卽
所稱妥爲安插之處亦未將如何辦理緣由詳悉具奏但云博羅
匪徒勦戮居多投首較少永安匪徒投首居多不得不慮其反側
俱應留兵防範等語博羅永安二處地方如果甯謐何以復需多
撥兵丁防守是所稱辦理完竣之處竟係顛預結局吉慶於此事
先旣失之濫殺繼又失之疏縱伊摺內情形已大略可見封疆大
吏平日不能先事豫防致有匪徒滋事本有應得之咎卽使辦理
妥善功過僅足相抵今吉慶旣已失察於前又復錯謬於後豈可

復膺總督之任吉慶著卽解任革去雙眼花翎暫留頂帶交與瑚圖禮那彥成會同審訊所有兩廣總督員缺著長麟補授加恩賞戴花翎卽馳驛前往長麟未到任以前兩廣總督印務著瑚圖禮暫行署理廣東巡撫印務著那彥成暫行署理俟長麟到粵後瑚圖禮仍回巡撫本任那彥成卽來京供職○諭嘉慶三年江西義甯州逆匪劉聯登等聚眾滋事一案曾據張誠基奏稱親自帶兵打仗剿滅完竣當將張誠基賞戴花翎嗣卽風聞此事奏報不實但未得確據本年十月內步軍統領衙門奏原任江西建昌縣知縣劉光道子控告張誠基冒功邀恩等情一案當經降旨派令侍郎姜晟前往審辦茲據姜晟奏到查審大槩情形一摺訊問張誠基據稱此事原奏實有粉飾數年來疚心未釋當日實因地方有反叛之事雖經辦竣恐干重罪是以將八月初二日按捕完竣作

爲伊帶兵打仗全竣之日其實並未親自臨陣等語並將張誠基繕具親供呈覽是張誠基於義甯州勦辦逆匪一案其捏飾具報之處業據自行供認張誠基以巡撫大員於地方逆匪滋事之案平日不留心查察及破案之後尙不將辦理情形據實陳奏又復粉飾情節今據供稱希冀輕減罪責試思失察逆匪之罪較之捏飾具奏之罪孰重孰輕耶張誠基著革職解京交軍機大臣會同刑部審擬治罪秦承恩著加恩以三品頂帶補授江西巡撫秦承恩未到之先著姜晟暫行署理○以吏部尙書琳甯協辦大學士加太子少保○以永慶爲禮部尙書由補○初彭齡以母老命來京命永保以三品頂帶爲雲南巡撫○辛卯以長麟母老命留京授都統以瑚圖禮署兩廣總督鐵保爲廣東巡撫吉綸爲漕運總督明德爲工部右侍郎由總管內務府大臣選○壬辰命 陵寢及盛京官

員凡降革留任仍支食原品俸○劉斌因病解任調清安泰爲浙江布政使以恩長爲廣西布政使珠隆阿爲安徽按察使

直隸道員

○丁酉諭大學士保甯等議奏籌辦外省祀祀從祀陣亡官員兵丁請嗣後凡應入祀昭忠祠者文職三品以上武職二品以上以及八旗官員兵丁仍於京師入祠致祭其四品以下文職三品以下武職及兵丁鄉勇各在本籍地方擇廟屋之旁蓋屋致祭至人數較多之處或百人或數十人合一牌位鐫刻名姓一摺官兵等效力疆場捐軀殉節國家報祀之典原以風勵臣民俾知觀感所有在各該原籍地方擇地致祭之處若僅將四品以下文職三品以下武職及兵丁鄉勇等歸於原籍致祭恐鄉愚等不諳例義妄謂同一陣亡而微末弁員尙邀入祀其官階較崇者轉不獲與未免滋疑國家辦理章程焉能一一家喻戶曉朕意各省文職三品

以上武職二品以上各大員除照大學士等所議在於京師入祠致祭外其原籍地方仍著一體設位致祭不特忠魂咸依故土亦使其鄉里親屬共見共聞益知國家誼美恩明倍生激勸至牌位鐫刻名姓若不酌定人數則辦理分歧亦於體制未協嗣後著以五十人合一牌位設龕致祭以昭畫一此係國家酬庸懋典各該省惟應實力經理迅速奏行不得稍有延閣該督撫於奉到諭旨後著卽照見定章程妥爲籌辦將省城及各外府如何辦理之處每一處辦竣卽先行詳細造冊陸續報部查覈仍俟該省統行辦竣後具摺奏聞備地方官吏視爲具文任情延緩或辦理未能妥協著該督撫查明參辦如該督撫籌辦不力任聽屬員等託故稽遲亦著該部據實參奏將此通諭各省知之○諭據禮部奏昭忠祠入祀諸臣內原任貴州巡撫曹申吉曾經從逆應請撤毀等語

曹申吉當吳逆背叛時從賊不知所終從前考查未確以致濫膺祀典實屬舛誤曹申吉著卽撤出昭忠祠將牌座銷毀并行文山東巡撫將該省志書內曹申吉本傳削除以昭覈實

十二月戊戌朔安徽宿州賊匪滋事費渚等勦平之○庚子諭明年正月初六日孟春時享 太廟遣官致祭自初三日始齋戒三

日是日因恭值 皇考高宗純皇帝忌辰前已令軍機大臣會同

禮部將朕所御服色悉心酌議旋據慶桂等奏稱是日究在齋戒

期內懇請御藍袍青褂其陪祀及執事之王公大臣官員穿貂褂

紅青褂挂朝珠其無執事及不陪祀之王公大臣官員俱穿紅青

褂不挂朝珠所議固是但思孟春時享係遣員恭代行禮與親詣

行禮者不同所謂吾不與祭如不祭朕端處宮中若竟御藍袍於

心究有未安來年正月初三日朕仍御青袍褂用展慕思其有執

事及無執事之王公大臣等應用服色均著照前議行○辛亥湖廣總督吳熊光奏孥獲在逃首逆崔宗和得旨嘉獎○癸丑諭本日申刻據額勒登保德楞泰勒保惠齡吳熊光等聯銜遞到六百里加緊奏報川陝楚勦捕逆匪大功戡定一摺朕與天下臣民同深欣慰邪教之始由奸民假燒香治病爲名惑眾斂錢無知愚民被其煽誘黨與旣多脅從愈眾起於湖北宜都當陽繼且闖入豫省由陝入川蔓延三省蹂躪地方無限生靈遭其荼毒不得不盡力勦辦以靖兇殘溯自嘉慶元年受璽之初卽值辦理軍務朕仰荷 皇考高宗純皇帝付畀之重兢惕實深幸蒙 睿謨指示兩年之間疊次殲擒起事首逆多名迨至三年 皇考聖壽益高秋冬之間 聖體違和每遇軍報到時猶復 親授機宜孳孳不倦而朕日侍 左右仰見 皇考精神漸減侍奉湯藥寢食靡甯心

志昏迷是以區畫未能周備以致勦捕事機稍形疏懈猶蒙 皇
考隨時訓迪迨彌留前一日仍以 望捷成什追維 在天未竟
之志五中悲感益懷仔肩四年正月初三日愴遭 皇考大故飲
泣椎心哀痛弗釋軍書旁午更不能謀慮周詳直至奉安 山陵
禮成始得專心軍務申明軍紀激勵將士責以成功數年來斬獲
著名首逆不下百餘人積惡頭目亦有數百名悔罪投出者數萬
餘人茲幸三省餘匪一律殄除者定大功飛章奏捷從此海寓救
甯昇平永慶仰賴 昊蒼眷佑 祖 考垂慈感慰之餘彌深欽
惕此事係勦捕內地亂民雖非平定外域拓土開疆可比然辦理
已及七載領兵大臣等沐雨櫛風馳驅險阻艱苦備嘗以及徵兵
轉餉團勇安寨之各督撫等並在廷參與機謀趨承密勿之王大
臣等均能各殫心力用藏鉅功允宜普沛恩綸酬庸懋賞成親王

於四年在軍機處行走幾及一載贊襄機務一切勦捕機宜深資
擘畫今大功告竣自應嘉獎公勤王已列親藩著施恩加賞一貝
勒令其子繇勲受封儀親王雖未在軍機處行走但自元年以後
軍報絡繹之時王見朕憂勤每申誠悃時進嘉謨茲當喜報邇來
同深歡慶著施恩加封一貝子令伊子繇志受封慶郡王永璘定
親王繇恩前在書房時咸念切軍務盼捷維殷永璘近來亦醇謹
自持深可嘉慰繇恩在御前大臣上行走夙夜勤慎當此奏績慶
成之際亦應一體加恩著再將永璘之子繇懋繇恩之子奕紹俱
封人八分公以昭恩渥額勒登保總統師干公忠懋著謀勇兼優
前此平定苗匪時卽經賞給侯爵嗣因勦辦邪匪遲延暫予降黜
自膺經略重任運籌決勝悉中機宜躬親行陣與士卒同勞苦用
能屢獲渠魁掃除苞蘖業經節次加恩晉封三等侯爵茲三省全

奏底平厥功殊偉額勒登保著晉封一等侯世襲罔替並授爲御
前大臣加太子太保銜賞用紫纁以彰殊錫德楞泰前於平定苗
匪時亦曾賞給子爵自授爲參贊後督率將士奮勇超倫所向克
捷前後殲賊最多勲績炳然節經封至三等侯爵著加恩晉封一
等侯加太子太保銜賞用紫纁伊子蘇沖阿並賞給副都統職銜
卽著齎送賞件前赴軍營看視額勒登保及伊父德楞泰用示眷
念勒保從前辦理狝苗擒渠埽穴一人之功曾經賞封侯爵至今
苗民安輯嗣命赴川省總統軍務奏報生擒賊首王三槐晉封公
爵旋廉知王三槐本欲自行投出其事尙涉疑似後授爲經略大
臣辦賊遲延降旨逮問復念其於川省地方情形熟悉仍令赴川
帶兵游升總督勒保自復任以來倍加奮勉督兵連獲首逆協同
德楞泰將川省全境廓清已加封一等男爵見當大功戡定覈其

功過雖不能復還原爵亦當加以褒封著加恩晉爲一等伯並加太子少保銜明亮爲多年宿將前此在金川帶兵立功甚著迨教匪滋事後派令統兵勦辦會將湖北孝感賊匪悉數殲除辦理最妥茲因在陝辦理逆匪遲延罷其世職又因南山賊匪未能迅速殄除降旨逮問念其久歷戎行仍畀以勦捕之寄伊自復用後亦尙能黽勉立功惟因年老不能衝鋒接仗諭令回京洊擢都統茲功竣載念前勞著加恩賞封一等男西安將軍賽沖阿固原提督楊遇春自隨征以來在諸將領中勇略尤著節次殲擒首夥各逆爲數較多伊二人俱經賞給騎都尉世職著加賞輕車都尉世職惠齡由湖北巡撫任內勦賊旋接辦總統軍務疊獲首逆張正謨等歷升尙書都統並給與宮銜及輕車都尉世職嗣守制回京因聞其在軍營亦有延誤之處且賊匪由陝竄川惠齡不能遏截會

經降黜示懲此次在陝甘總督任內勦辦南山餘匪辦理遲延復革去花翎降爲二品頂帶今大功底定念其從前著有微勞惠齡著加恩賞還頭品頂帶花翎吳熊光自簡任湖廣總督以來於一切糧運團堡事宜實心經理著加恩賞給太子少保銜仍交部從優議敘姜晟前在湖北辦理軍糈並無貽誤嗣因在直隸總督任內報災延緩罷斥治罪念其尙無大過見以四品頂帶擢任侍郎著加恩賞給二品頂帶倭什布前在湖廣總督任內亦曾帶兵勦賊賞給雲騎尉世職嗣因辦餉稽遲被劾逮問訊明尙非有心貽誤其平日居官聲名尙好復行錄用以三品頂帶補授巡撫茲著加恩賞給二品頂帶福甯前在楚境勦辦賊匪曾加賞宮銜因在軍營節次獲罪罷職遣戍旋經釋宥以侍衛前往西藏辦事茲著加恩賞給副都統銜英善前以侍郎署四川總督亦有勞績嗣

緣事鐫秩命在西藏辦事亦著加恩賞給頭等侍衛溫承惠楊揆
文需劉清或帶兵堵剿或籌辦軍儲勤勞數載均著加恩交部議
敘至軍機處行走之大學士慶桂董誥尙書戴衢亨均經 皇考
簡任綸扉克盡忠悃知無不言言無不盡自用兵以來承旨書諭
勤慎小心朕敬推 皇考之恩慶桂董誥著賞給騎都尉世職戴
衢亨著加太子少保銜仍賞給雲騎尉世職尙書劉權之德瑛雖
在軍機處行走未久其素日陳奏亦時有所見協辦大學士朱珪
尙書彭元瑞雖未入直樞廷亦能留心軍務每有敷陳均著加恩
交部議敘大理寺少卿章煦在軍機章京上行走年久辦理軍務
始終其事著加恩交部從優議敘宜縣前在軍營督剿洞汝河等
處賊匪尙屬認真後因總統軍務安坐大成寨任賊匪往來奔竄
革職發往伊犁念其年老釋放回京伊究曾出力亦著加恩以六

部員外郎用景安前任河南巡撫不能堵剿賊匪致令延及川陝其罪甚重業經問擬重辟念其平日居官廉潔從寬監禁茲軍務告蒞著加恩釋放伊係本身獲罪非若完顏扎拉芬因伊父魁倫發遣者可比著發往熱河充當披甲以示朕覃敷惠閭嘉賞成功至意通諭中外咸使聞知○諭原任兩廣總督吉慶平日居官操守廉潔辦理地方公事尙無貽誤前因查辦歸善博羅永安等縣添弟會匪一事節次奏摺俱係寥寥數語聲敘總不明晰其前後自相矛盾之處甚多朕恐其有濫殺激變及有心疏縱情事諭令那彥成於江西審案之後就近赴粵查訊復因永安首匪曾清浩等三犯投出後吉慶不行定擬輒奏請安插辦理謬誤特將伊革去協辦大學士拔去雙眼花翎並解兩廣總督之任旋據瑚圖禮奏稱吉慶自戕身故更堪駭異恐其中或有別情茲據那彥成

查奏歸善博羅會匪實係叛逆吉慶帶兵攻剿殲厥渠魁餘黨瓦解地方遂得平靜吉慶辦理此案並非濫殺激變惟曾清浩等止各帶百餘人投首而吉慶則奏稱曾清浩率夥投出四千餘人官粵瓏賴東保率夥投出一千餘人其官兵攻剿天字嶂賊匪一節並無其事吉慶率聽員弁稟報虛詞遠爾人奏並將永安投首賊目槩予甯釋加以賞賚以致民心不服紛紛控訴吉慶慚畏交加因病後糊塗自尋短見等語吉慶辦理疏縱種種錯誤之處固有應得之咎設曾清浩等三犯竟已釋放則獲罪甚重今據那彥成奏稱首犯曾清浩官粵瓏賴東保三人俱在監禁見經審明正法是吉慶之罪斷不至於死且吉慶平日素有廉名卽此次獲咎亦不過革職或發往新疆效力將來尙可用爲巡撫何至遽爾輕生況身爲封疆大臣卽罪在不赦亦當靜以待命豈得私行自盡效

匹夫溝瀆之爲是其自戕一節卽吉慶之罪實無足惜豈尙可復
邀恩卹至吉慶辦理疏縱之處既經那彥成查明委無別項情事
亦不必再行追論著那彥成傳知伊家屬扶柩回旗並將吉慶前
後獲罪及身故原由通諭知之○甲寅諭固倫和孝公主素爲
皇考鍾愛下嫁固倫額駙豐紳殷德其品秩原與貝子相等嗣因
伊父和珅身獲重譴是以將豐紳殷德一併革職旋經朕格外加
恩授以散秩大臣今當大功戡定恩逮親藩因念固倫和孝公主
亦應一體錫予恩施著將豐紳殷德賞給民公品級仍在散秩大
臣上行走俾公主同深歡感以示朕篤念推恩之至意○丙辰
諭安南國爲南徼藩服前此黎維祁與阮光平構兵先經率屬內
投繼復棄國潛遁皇考高宗純皇帝以黎維祁巽懦無能不能
自振天厭黎氏不宜復加扶植惟念其流離失所將黎維祁送

京入旗授職養贍其時阮光平修表啟關額求內附請親詣闕廷

祝釐瞻覲皇考高宗純皇帝鑒其誠悃錫之敕印封阮光

平爲安南國王阮光平受封之後時修職貢終其身祗承恩眷

及子阮光纘嗣封比年來閩粵洋面屢有劫盜經疆吏訪問入告

該國竟有潛通窩納之事朕以誠信懷柔遠人尙謂事涉疑似止

令飭知該國一體查緝旋據阮光纘自陳惶悚堅稱實不知情本

年八月吉慶奏到農耐國長阮福映遣使齎進表貢耕送盜犯莫

觀扶等三名係內地奸民經安南招往授以僞職並給與印札行

劫內洋審訊明確已伏厥辜是阮光纘參養賊盜通同劫掠負恩

背叛情迹顯然實爲王章所不宥設阮光纘此時尙膺封土必應

聲罪致討以懲兇詐乃伊國連年與農耐戰攻上年阮福映拔取

富春時阮光纘輒將天朝所頒敕印遺棄潛逃其罪更無可追阮

光續不念 皇考高宗純皇帝覆轡深思又不能繼伊父之志於
臣爲不忠於子爲不孝今已自取滅亡益見傾覆之理昭然不爽
阮福映能爲天朝緝捕逋逃繕獻請旨定奪並將安南舊領敕印
遣使呈繳深爲恭順茲表陳擣兵顛末本係爲伊先世復讐雖得
其國土不敢擅專虔遣陪价納貢請封除將表文請賜建國名號
之處交大學士會同六部尙書議奏外所有安南阮光續獲罪覆
滅及阮福映恭順出力緣由先行通諭中外知之○丁巳諭御史
朱紱奏請寬地方官去思碑例禁一摺所見甚屬非是守令職司
民牧分應廉潔自矢撫字爲懷果有善政及民自必口碑載道閱
久流傳原不假區區製衣勒碑粉飾虛聲 世宗憲皇帝 高宗
純皇帝屢申飭禁意在崇實黜浮使人皆盡心實政若如該御史
所奏專以外飾之繁文驗在官之賢否如從前甘省卽有抑勒部
東華續錄

民製造衣繖之事亦豈盡足憑耶總之地方官惟在悃悃無華實至者名自歸上年直隸省知縣朱杰錢桂因盡心賑務惠逮閭閻及緣事去官百姓等愛戴懇留奏聞後均經格外加恩朕亦何嘗不以輿論之公獎循良之績但不必特寬例禁致開沽名飾譽之端且各省從前去思德政等碑俱經仆毀又豈有復行建立之理朱紱不曉事體著飭行○諭軍機大臣等昨據孫玉庭奏進阮福映請封表文朕詳加披閱所請以南越二字錫封一節斷不可行南越之名所包甚廣考之前史今廣東廣西地界亦在其內阮福映邊徼小夷此時卽全有安南亦不過交趾故地何得遽稱南越妄知非欲夸示外夷故請易國號先爲嘗試自應加以駁斥已令軍機處代擬檄諭一道並原表交孫玉庭發回看其接奉之後如何稟覆候旨酌辦至阮福映求封南越顯有恃功要請情事恐其

心存叵測所有廣東廣西一帶海道邊關俱著密飭地方官留心防備不可稍涉懈弛○戊午以巴甯阿爲盛京工部侍郎

內務府

大臣○辛酉諭據初彭齡奏滇省辦理維西軍務動用司庫銀兩

布政使陳孝昇地西道薩榮安通同弊混並提存關稅私支養廉及管理關廠縱僕橫行各款必須徹底根究陳孝昇薩榮安俱著解任開缺著派兵部侍郎那彥寶大理寺少卿章煦馳驛前往查辦那彥寶卽著署理雲南巡撫印務初彭齡著俟那彥寶到後卽行來京供職○調百齡爲雲南布政使以公義爲貴州布政使齊布森爲廣西按察使

由山西解送

○是歲朝鮮來貢○會計天下民

穀數各省通共大小男婦二萬九千九百七十四萬九千七百七十名口各省通共存倉米穀三千一百一十八萬四千五十二石一升一合六勺

東華續錄

嘉慶十五

臣王先謙敬編

臣周淪蕃恭校

嘉慶八年癸亥春正月庚午以瑚圖禮仍爲廣東巡撫倭什布爲

兩廣總督調鐵保爲山東巡撫

由廣東調

○丁丑諭前因姜晟奏到查

審張誠基於剿辦義甯州滋事匪徒一案實未親身督戰係屬飾

詞陳奏當經降旨將張誠革職解京交軍機大臣會同刑部審

訊治罪本日張誠基解到據軍機大臣會同刑部堂官審訊張誠

基俯首認罪無可置辨經軍機大臣等照依合奏公事有規避增

減緊關情節朦朧奏准施行律擬斬監候因屬按律辦理但閱其

情節張誠基聞知該州匪徒滋事之信在省派撥官兵分投堵剿

尙非漫無調度特因到彼已遲未得親身督戰而匪徒先經兵勇

殲盡彼時如果據實陳奏不但不加之罪尙當量予加恩交部議敘乃張誠基輒於地方有反叛重案已干失察之咎又恐未經親辦獲戾滋重遂將按捕全完之日作爲帶兵打仗之期捏詞飾奏希圖獲功卽過其罪實在於此事與伊桑阿相似而實不同伊桑阿簡任貴州巡撫時因有應賠官項會面奏請將俸廉全數扣繳朕尙念及若將俸廉全扣恐辦公必有不敷加恩止令扣繳一半冀其保全操守詎伊到任後卽以賠項爲名令各府幫貼銀兩又令屬員修造署屋並不給發價值貪黷營私聲名狼藉而於奏報攻克石峴苗匪一案據稱由銅仁趕赴前敵傳諭各將弁四面兜圍並稱親見山梁有執旗指揮面目伊卽傳令帶兵各員向執旗之人指定放槍立時殲斃等語眞似身在行閒歷歷如繪詎知伊竟安坐銅仁並未親身前往公然以毫無影響之事捏造虛詞冒

功誑奏其罪較重彼時琅玕等審辦亦將伊桑阿問擬斬候朕不待部議特降旨改爲絞決今張誠基尙無貪劣款蹟卽奏報辦理義甯州匪徒一案因恐遲到獲罪希圖掩飾而於聲敘剿賊情節尙非全屬子虛且伊究已親身前往於軍務並無貽誤亦未有捏冒錢糧等弊尙可稍從末減張誠基著從寬改爲絞監候交刑部監禁餘著照議完結朕辦理庶獄於罪名輕重悉視其人之自取此案張誠基與伊桑阿情罪本殊是以辦理不同並非嚴待滿洲而寬於漢員也將此通諭知之○命伊犁廣開屯田其無耕牛者官給之○壬午諭慶桂等奏懇請刊刻御製詩初集頒示中外一摺朕萬幾餘暇仙事摘毫本不欲與文士逞藻矜奇傳播藝苑但自元年受璽日侍皇考訓政凡釐綱剔紀決勝籌幾諸大端無不寅承指示見諸施行往往紀以吟詠迨四年後夙夜孜孜亦

惟以軍務民生雨暘水旱爲念篇章所積大率紀捷勤民之什居
十之八九其泛覽留題者絕少朕素不喜風雲月露之詞亦不欲
以此擅場敬思 皇考高宗純皇帝學集大成 奎章富有每十
二年爲一集編至五集尙有餘集實古來詩人所未有朕游藝篇
章曷敢上同 聖製意欲以八年爲一集今旣據內廷臣工合詞
奏懇頒刊著照所請交慶桂等將元年至八年御製詩編爲初集
繕校刊刻○乙酉予五城老病貧民棉衣○己丑諭王汝璧奏鳳
陽府同知長慶因母老呈請回旗賞當京差一摺所奏非是長慶
係長琇長麟胞弟上年長麟簡放兩廣總督時因伊母年老雖有
伊兄長琇在京侍奉而長麟爲伊母素所鍾愛亦未敢在朕前懇
辭外任朕察其母子依戀情切特加恩留京供職已可遂其烏哺
之私今長慶又以接到家信知伊母近來精神衰邁伊心懸兩地

殷食不安呈請回旗自因見有將長麟留京侍母諭旨故爲此請
冀非出於至誠不過沽名取巧長慶如果真心戀母於從前補放
同知計伊母業已年逾八旬彼時長麟又不在京卽不應遠離赴
任何待今日始行呈請回旗耶終養所以教孝但定例家有次丁
卽有老親年逾八十者並未嘗勒令槩行終養設一家多至弟兄
七八人者俱在外出仕紛紛以親老同時告歸殊非國家用人之
道且或因缺分平常藉詞飾請亦恐開規避之漸所有長慶呈請
回旗當差之處著不准行○甲午 上御經筵○乙未以琉球國
貢船漂沒詔免補進士貢

二月壬寅欽差內閣學士那彥成等奏攻克廣東鐵籠嶂賊巢生
擒首逆黃亞程等得旨嘉獎以那彥成署吏部侍郎○癸卯賞故
大學士蔡新子本份舉人○乙巳諭大學士會同禮部議駁給事

中丞祚奏請伊犁地方設學一摺所駁甚是伊犁地處極邊多係
索倫錫伯察哈爾厄魯特游牧之地迥非烏魯木齊建立府廳州
縣設有學額者可比該處毗連外域自當以嫺習武備爲重若令
其誦讀漢文勢必荒疏技勇風氣日趨於弱於邊防大有關礙且
屯田民戶及流寓商賈來去無常亦未必盡能讀書識字儼伊犁
地方增設學額則吉林黑龍江等處煙戶繁稠不更當奏請設學
額乎此事如係漢員陳奏或尙云未能深悉邊地情形永祚身係
滿洲乃以斷不可行之事撫拾陳請太屬不曉事體矣至該給事中
摺內稱派官犯生監充當教習及效力贖罪之科甲出身廢員
充當主試必係見在伊犁官犯中有伊親友在內故有此沽名取
巧之奏希冀爲伊等邀恩地步耳永祚著傳旨申飭○辛亥免四
川屢被教匪滋擾之太平等九廳州縣額賦並緩徵雲陽等十六

應州縣太平等五廳縣賦稅○己未 上啓鑾謁 東陵○免經
過地方額賦十分之三○甲子 上謁 昭西陵 孝陵 孝東
陵 景陵 裕陵同鑾○額勒登保奏技捕通江縣餘匪殲首犯
姚欣祖生擒陳大海得冒獎資

閏二月丁卯以戴均元爲工部右侍郎王汝璧爲內閣學士阿林

保爲安徽巡撫調邵洪爲安徽布政使以廣厚爲江西布政使

由都統○癸酉以請轎校尉行急脫肩革豐紳濟倫掌鑾儀衛事兵

部尙書以長麟爲兵部尙書

由都統

○額勒登保奏生擒首逆宋應

伏殲盡餘黨○丙子以江西上年歉收命減價平糶○戊寅 上

還京師○癸未諭本日本在萬壽山玉蘭堂用膳辦事正值召見大

臣時見有太監自西邊直至宮門猝然退避又有園戶自東而西

徑行走過均屬不合朕召見大臣處所該管大臣及本處總管太

監理應先時派人查管以昭嚴肅豈有任聽閒人往來行走之理
所有管理三山事務之縑布額勒布著傳旨申飭再朕此次謁
陵往還計已二旬回蹕又閱六七日總未見內務府衙門有陳奏
事件及引見官員之事該衙門所管事務較繁豈而月以來竟屬
一無所事昨召見縑布明德朕卽微示其意據奏見有應行引見
之員尙未揀選是以未經帶領等語試思該衙門司員不過照常
揀選有何難辦致虛時日顯係因豐紳濟倫見爲內務府大臣列
名居首刻下告病在家該大臣等輒羣相觀望此又如從前和珅
總理部務時諸事專擅遇伊偶有告假等事各大臣卽將應辦事
件稽延等候最爲惡習內務府大臣同係總管體制相埒若因列
名居首之人請假眾人卽置公事於不辦此風斷不可長所有該
總管內務府大臣等俱不免爲積習所染實屬卑鄙均傳旨申飭

除將該衙門應行陳奏等事速行辦理外並將此通諭知之○乙酉予告大學士王杰陛辭 上以 高宗純皇帝御前陳設玉鳩杖並 親書御製詩章聯句賜之仍加賞人參一斤給饌賜餞命馳驛回籍經過地方二十里內官員護行○定親王縣恩等拏獲潛匿禁門逞兇拒捕之逆犯陳德 上命大學士軍機大臣會同九卿科道等嚴鞫○以拏獲陳德寬定親王縣恩固倫額駙喀爾喀親王拉旺多爾濟御用補褂封縣恩子奕紹貝子拉旺多爾濟子巴彥濟爾噶勒輔國公賞乾清門侍衛喀喇沁公丹巴多爾濟貝勒在御前行走御前侍衛扎克塔爾世襲三等男珠爾杭阿桑吉斯塔爾世襲騎都尉○以廢弛門禁革阿哈保護軍統領副都統仍留世職賞副都統銜在乾清門行走革蘇沖阿副都統銜作為頭等侍衛餘降罰有差○丙戌德楞額奏剿捕四川老鴉寨竄

匪得旨嘉獎下部議敘賞還其子蘇冲阿副都統銜○丁亥 上

親耕藉田○己丑諭二十日進宮齋戒將入順貞門突有一人趨出彼時朕乘轎已入宮門實未見其面貌差內監詢御前大臣方知其兇悍拒捕情狀因命軍機大臣會同刑部嚴審竟日所供情節出乎情理之外次日又添派滿漢大學士六部尚書會審所供矢口不移又命九卿科道一同會審仍如前供在諸臣見此等逆犯義憤自不容已必欲窮究主使何人同謀何人有無黨與反復究詰悉心訊問忠君爲國之忱必應如是盡心窮詰並非鍛鍊周內也然朕爲天下共主以誠心御下毫無猜忌此中外所共知共見者八年以來雖無仁政及民然亦不敢妄行誅戮既不妄殺有何仇怨舉朝臣工皆朕之兄弟子姪至親骨肉朕又何忍令兇犯扳扯况實無疑忌之人乎總之天下之人何所不有譬如獬犬噬

人原無主使賜梟食母豈有同謀若一味刑求反肆狂吠所言之人如何存活卽不究問終是疑團所損者大矣朕所慚懼者風化不行必有失德始有此做予之事當謹身修德勤政愛民自省己咎耳所有此案兇犯陳德並伊二子卽行公同按律定擬具奏候旨施行其餘卽行省釋不可累及無辜但二十日捕捉兇犯之時定親王繇恩首先奮力推卻衣被浮傷固倫額駙親王拉旺多爾濟御前侍衛丹巴多爾濟珠爾杭阿扎克塔爾桑吉斯塔爾同擒逆犯卽時就縛丹巴多爾濟身被三傷實堪嘉尙是以超封貝勒繇恩等俱分別加恩矣然御前侍衛及各項人等彼時不下百餘人而奮不顧身擒捕兇犯者止此六人在繇恩拉旺多爾濟等六人受恩固厚然百餘袖手旁觀之人竟無一受恩厚者乎繇恩係朕之姪拉旺多爾濟係朕之額駙固應休戚相關朕懷深慰然百

餘袖手旁觀者豈無朕之至親豈非世受國恩之臣僕乎見此等
事尙如此漠不關心安望其平日盡心國事耶朕之所深懼者
此而不在彼諸臣具有天良自問於心能無愧乎特書此諭中
外知之○逆犯陳德及其子祿兒對兒伏法○庚寅德楞泰奏
搜捕竄匪殲斃首逆曾芝秀○那彥成等奏續獲會匪首逆溫
亞利永安全境肅清○壬辰諭本日周興岱奏因大考屆期陳
明年老有疾懇請休致一摺所奏非是周興岱學問本屬平常
從前在編修任內大考時卽曾列四等茲又隔十餘年自更形
荒落上年伊由侍郎典試江西獲咎經部議以革職朕特加恩
用爲翰林院侍讀學士此次大考周興岱本應與試若隨眾較
藝卽使考列下等或尙可酌量施恩今一聞大考之信輒冒昧
奏懇乞休據稱去冬病日數旬眼力昏花今春又復重感風
邪尙未痊愈如果屬實卽應

早爲請假乞休何待聞知大考始行奏懇耶設此時尙無大考之信伊自必覲顏戀棧濫廁清班尤屬有心取巧且伊雖曾在六員見已降補讀學卽有所陳請亦應於掌院前具呈代奏乃自行摺奏亦屬越分周興岱懇請休致旣稱老病不能應考卽著勒令休致○癸巳德楞泰奏殲斃首逆劉渣鬍子

三月丙申 御試翰林詹事等官擢陳嵩慶等三員爲一等餘升黜留任有差○戊戌諭泰承恩奏請將江西省帶徵漕糧分別起運酌留以省造辦剝船經費一摺斷不可行據稱江西省上年緩征漕米今秋帶征完納之後漕船不能同時並運若造辦剝船又滋糜費查該省見在常平倉穀多有缺額請將帶征漕米賞留一半以省採買仍將採買價銀解京收買旗丁餘米等語各省應徵漕米爲天庾正供每年徵收完納之後皆應全數運通卽使倉貯

十分豐裕亦富源源輓運以資儲備近年間有因地方水旱災禡及軍需緊要曾經降旨截漕非可引爲常例豈有因常平缺額輒將太倉之粟任意截留彌補之理若有漕省分相率效尤成何事體至所云新舊兩漕不能並運試思該省緩徵漕米非止一次向來帶征全完之後各幫船如何帶運赴通豈無舊定章程可以遵辦其各省旗丁兌贖餘米向准在通糶賣原所以恤丁惠民若如秦承恩所奏將該省常平糶價等銀解交直隸總督在通收買則餘米盡數歸倉於京師市價民食豈不更有妨礙所奏實屬非是秦承恩係朕棄瑕錄用之人地方公事尤應實心經理乃於運京漕米並不籌辦妥協欲借以彌補倉廩殊爲取巧秦承恩著傳旨申飭所有此項米石應如何帶運之處著交戶部妥議具奏尋奏江西省嘉慶七年分緩徵漕米請分作兩年帶徵酌運除先儘額

設漕船酌量均勻派搭外其餘贖米石照向例令旗丁雇船足運從之○甲辰諭軍機大臣等本日據額勒登保奏通籌三省大局一摺閱之實深煩悶益增焦急據稱設營築城實可制賊奔逃試思見在零星散竄之賊皆不過在深山老林潛匿蔓延殘喘卽從前大股賊匪亦並未敢撲犯城池占據寨碣此時卽使擇要興築設兵駐守賊匪知有兵防早經繞道遠避官兵安能制其死命況寨碣百姓各處散布遇有零星匪竄至尙可擒拏若如額勒登保所奏城營修整卽可將附近寨碣百姓遷徙入城是直將民田廬舍委之賊匪而賊蹤所至無人抵禦更得來往自如乃轉稱賊匪不敢由彼奔突乎至所稱興築工程更可以工代賑一節無論久經從賊習慣搶掠者斷不肯勤苦工作圖趁口食卽使果有窮蹙潰敗暫思備趁之賊而有工時爲民無工時卽仍可爲賊至如摺內

稱各處裁撤鄉勇送回本籍後不能謀生見仍有隨營覓食充當夫役之人若以工代賑兼可以養遊民設將來工程完竣亦難保遊民不仍散爲賊額勒登保又將如何安置乎又據稱統計川陝兩省城營各工約需銀四十萬兩如蒙恩給發督撫及時趕辦額勒登保並可就近查覈督催等語尤爲紕繆額勒登保總統師于自應以戢暴安民爲己任乃不思辦賊轉欲監工豈經略重任僅在監督工程抑伊專辦工程又另派人前往代辦經略之任乎七年以來所奏之摺從無似此次不通事體之至且據摺內稱陝省兵勇共有三萬餘人川楚尙不止此統計零匪不過千四五百人是各路兵力較賊數多至數十餘倍何難迅掃餘氛力圖歲績昨經疊降諭旨令伊於麥秋前將餘匪一律肅清乃摺內稱秋閒定可觀成其意直欲遲至秋閒始能淨盡豈此數月內額勒登保竟

任零匪東奔西竄唯以督工爲亟耶看來額勒登保竟不盡心辦賊殊負委任本應全行黜革姑念八載勤勞向著勲績著暫留任以觀後效先行革去御前大臣並紫纓仍授御前侍衛傳旨嚴行申飭額勒登保於漢文素非通曉摺內以工代賑諸語斷不能解此必係三省督撫及不肖地方官因軍需不能報銷希圖借此延緩額勒登保受其慫恿故爲此奏從前屢有人在朕前言及軍務日久未竣之故總由於此彼時朕原不肯輕信今閱所奏竟不免有此情弊額勒登保誤聽浮言咎無可諉但此事究竟係何人主見並著明白覆奏○贈四川陣亡甘肅提督穆克登布二等男遣御前侍衛扎克塔爾帶領侍衛十員往奠茶酒子祭葬諡剛烈○己酉諭此次大考翰詹原因向來每隔數年卽大考一次是以循例舉行其考列前三名者予以超擢此外考列二等各員或量升

一階或賞給段匹卽考居三等後者亦不過降等錄用或分別罰俸稍示薄懲此內有曾任大員如李潢吳省蘭周興岱三人其才具皆所素悉豈尙復以一試定其優劣如果有欲行罷斥之員何難明降諭旨又豈必以考核翰林加之激汰耶見在考試前列各員中亦無朕所素識者是大考黜陟朕無所容心於其閒乃周興岱見有大考諭旨率行陳奏懇請休致試思周興岱平日學問雖不如李潢吳省蘭伊二人見俱考列二等李潢在前量擢贊善吳省蘭在後亦照例候升周興岱若果與考安知其不倖居前列或轉得邀升擢卽使考居後等朕尙可加恩或不予降調或降調亦不至於廢棄特因周興岱自請休致是以降旨勒休咎實由於自取但念伊父周煌曾任上書房總師傅周興岱前在南書房行走稍有筆墨微勞著加恩賞給編修准其在館效力○命病痊來京

原任直隸總督陳大文以頭品頂帶署吏部右侍郎○甲寅免湖北教匪滋擾之蒲圻等四十二州縣衛及近賊之江夏等十六州縣衛通賦○調廣厚爲廣東布政使康基田爲江西布政使○丁巳 上詣 黑龍潭祈雨○庚申 皇后行躬桑禮○癸亥諭本日據縣恩等會同議奏稽察禁門及行在扈衛各事宜一摺已降旨依議並飭令改正頒行矣適恭閱 皇考高宗純皇帝實錄乾隆二十三年六月內有瘋顛僧人持刀入東華門一事經軍機大臣會同刑部議將未經攔阻之東華門進班護軍參領等分別定擬並將護軍等擬絞欽奉 諭旨護軍參領護軍校護軍等看守禁門係其專責似此瘋疾之人強行入內當經以棍擊斃或以刃扎傷俱分所當然乃守禦多人竟不能一爲攔阻如軍前遇敵諒不過恇怯奔潰而已尙能奮勇殺賊乎此卽應如所奏亦無不可

但積習日久實未嘗經歷此等事件且人數眾多著加恩擬絞之
護軍校努爾瑚訥長玉護軍福森保等十六人俱行寬免發往拉
林阿勒楚喀餘依議此係朕格外施恩嗣後看守禁門之章京護
軍校護軍等各宜勤慎當差嚴爲守衛懲訓飭後如仍前怠玩偷
安一經查出必從重治罪決不姑貸不可因此次加恩妄生希冀
也將此旨著八旗護軍統領書於木牌凡進班之處俱行懸挂悉
令進班人等知之欽此仰見 皇考準情定法垂誠諄諄至意因
思前月逆犯陳德手持小刀直入神武門於朕進宮時突出逞兇
拒捕扎傷御前親近王大臣較之瘋癲僧人持刀入東華門其情
罪尤爲重大然彼時未經攔阻之該管護軍校護軍等均經擬絞
仰荷 皇考特恩分別發遣而此次逆犯陳德進東華門繞至神
武門該管護軍章京護軍等並不能先事查拏經朕降旨分別懲

處止於革退枷責其最重之賢福一人亦不過發往熱河披甲實
係朕法外施恩逾格寬宥嗣後禁城各門該管之進班大臣章京
護軍等惟當各思感奮按照所定章程實力奉行小心守護儻日
久因循不思職守致有廢弛必當重治其罪不能曲邀寬貸至前
蒙 皇考諭令將所奉 諭旨書於木牌懸挂進班處所原欲使
大臣官兵等觸目儆心恪恭盡職今閱時既久此項木牌因已損
壞並不懸挂以致進班人等不知儆惕漸就懈弛著前鋒統領護
軍統領等敬將前奉 皇考諭旨恭錄一通並朕此次所降諭旨
一併書於木牌在各進班處所敬謹懸挂俾知遵守勿替以副朕
訓誡成全之意

夏四月乙丑朔免陝西教匪滋擾之南鄭等三十七廳州縣逋賦
並承辦軍需之咸陽等二十七廳州縣及沿邊轉運軍火之膚施

等二十三廳州縣逋糧十分之五○丙寅賞已革廣東布政使常齡藍翎侍衛爲烏里雅蘇台參贊大臣命改名常安○庚午諭軍機大臣等孫玉庭奏接到阮福映回稟請旨遵行一摺覽奏俱悉阮福映以前次檄諭係出孫玉庭之意未經奏聞故此次仍以請封南越表文稟懇代奏朕閱其稟文情詞委婉極爲恭順所稱該國王有越裳之地今併有安南不願忘其世守襲用安南舊名自亦係實情孫玉庭卽檄知該國長諭以前此因來表請封國號名義未符未敢冒昧具奏今來稟詳述建國始末請錫新封已據情奏聞大皇帝率有諭旨以該國長前此航海輸誠恭繳阮光纘遺棄舊頒敕印並縛獻海洋逋盜恪恭請命具鑒惻忱茲請錫藩封處具表貢特諭嘉納至所請以南越名國之處該國先有越裳舊地後有安南全壤天朝褒賜國封著用越南二字以越字冠於上

仍其先世疆域以南字列於下表其新錫藩封且在百越之南與古所稱南越不至涸滑稱名既正字義亦屬吉祥可永承天朝恩澤見已令陪价等詣闕請封所頒敕印卽以此二字稱名該國膺此嘉名備位藩服更足顯榮勿替孫玉庭接奉此旨一面檄諭阮福映一面卽委員伴送該使臣恭齋表貢進京諭以天氣漸近暑熱可緩程行走以示體恤約於七月杪到京彼時朕駐蹕避暑山莊正值哈薩克入覲亦可令其一體與宴仍將該使臣自粵西起程日期先行奏聞○免甘肅教匪滋擾之隴西等二十七廳州縣並供應軍糧之皋蘭等二十廳州縣通賦○勒保奏擒獲賊首宋國品得旨嘉獎○壬申諭軍機大臣等琅玕奏江外夷人圍擊首逆擒戮賊黨各情形一摺據稱隴夏一帶夷人攜家乞投共二百數十名口願將家口留營作質男丁仍回江外截擊首逆當經琅

玕派撥夷勇帶同前往兜圍連次斃賊數十人擒獲恆乍緬妻母及妻弟二名並有老幼男婦百餘人哀籲乞投亦經量給口糧全行放回見據恆乍緬妻母供稱願將二子留贖伊單身過江找尋伊女密爲商酌設法辦理等語所辦甚好且據稱該逆攜帶多人向不裹積糧食惟仗各寨隨時供應今經琅玕密諭各寨令於該逆就食時乘機縛獻看來該逆勢極窮蹙自可卽就俘擒琅玕當迅速妥辦俟恆乍緬就擒後卽將該逆疫運處死在彼梟示俾江內江外夷人共知儆懼卽可完案其擒獲該逆之夷人自當從重獎賞或奏請賞給頂帶以示鼓勵至恆乍緬之妻及妻母妻弟等本例應緣坐之犯但既據該夷婦供稱本係江內獐獐被恆乍緬硬將伊女奪占爲妻以致棄家失業儻該夷婦母女果能將恆乍緬設法獻出或別經擒獲後訊明該逆妻室實係奪占卽當將夷

婦及子女等一併釋回俾免株累其江外夷人等琅玕仍當出示曉諭以爾等本係向化夷人特因恆乍綳蠱惑滋事爲所愚弄今官兵已將首逆擒獲正法其餘槩不株連前此逃出乞投之百餘人均經量給口糧加恩釋回爾等嗣後當各安生業勉爲善良以承天朝恩澤如此明白開導並一而加以撫恤該夷眾等自必心知感激安分守法則邊陲可以永靖又據另摺奏緬甸土司孟幹稟懇將腊蚌咱襲職一節覺布幹旣附緬甸則腊蚌咱應否承襲土職應聽該國自行查辦其覺布幹送伊國王禮物尤與天朝毫無關涉何須該土司稟知况據稱腊蚌咱逃赴京城奏明大皇帝賞給印信轉回原籍之語查明並無其事其捏飾已屬顯然至該土司稟內有伊國有事卽行具稟天朝天朝如有應辦之事祈賞示知等語尤不成話該國係化外蠻夷如有應辦之事天朝旣不

必與聞至天朝政事豈有傳播外夷俾共聞知之理看來自係該國與暹羅構釁因見暹羅勢強思欲藉以乞援天朝助其聲勢乃作此隱躍之詞冀爲地步殊屬狡詐且暹羅臣事天朝極爲恭順揆諸柔遠字小之義亦不應干與其事琅玕惟應札諭駁飭以杜其續行瀆稟亦不必提及該國與暹羅構釁之事若不喻其意者然並將原稟及覺布幹與緬甸原文一併發還方爲得體至伊送象牙孔雀尾自應發還琅玕業經賞給段匹足矣○癸未命八旗及地方官化導旗民敦行孝弟○丙戌 上詣黑龍潭祈雨○丁亥雨○辛卯德楞泰奏生擒首逆張世虎

五月乙未諭兵部議奏稽查關口出入民人分別酌定章程一摺山海關外係東三省地方爲滿洲根本重地原不准留寓民人雜處其閒私墾地畝致礙旗人生計例禁有年自乾隆五十七年京

南偶被偏災仰蒙 皇考高宗純皇帝格外施恩准令無業貧民出口覓食係屬一時權宜撫綏之計事後卽應停止乃近年以來民人多有攜眷出關並不分別查驗槩准放行卽因嘉慶六年秋閒畿南州縣被水成災開有窮黎攜眷出口之事迨至上年直隸收成豐稔民氣已復何以直至今春尙有攜眷出關者數百餘戶彼時韋陀保正任該處副都統稽查是其專責見有出口民戶如許之多自應奏明請旨卽放行以後亦當奏請飭禁乃漫不經心前後總未陳奏任意辦理殊屬非是韋陀保著交部議處嗣後民人出入除隻身前往之貿易傭工就食貧民仍令呈明地方官給票到關查驗放行造冊報部外其攜眷出口之戶槩行禁止卽遇關內地方偶值荒歉之年貧民亟思移家謀食情願出口營生者亦應由地方官察看災分輕重人數多寡報明督撫據實陳奏候

旨允行後始准出關仍當明定期限飭令遵限停止毋得日久因循致滋弊端此次定立章程以後並著直隸山東各督撫接到部咨徧行出示曉諭以見在欽奉諭旨飭禁民人攜眷出口該民人等當各在本籍安業謀生不得輕去其鄉希圖出口謀食相率赴關以致半途而返庶民人知干例禁不至徒勞跋涉也○諭近聞宗室覺羅有因無自置住房於各處浮居者詳究其故蓋因生齒日繁生計不能充足或不知節儉任意奢糜以致棲身無所因思宗室覺羅必須先裕其生計然後施之以教且以宗室覺羅而致浮居亦不成體制著交管理宗人府王公等會同八旗滿洲都統查明委係無力之宗室覺羅或擇地另建房屋或酌量歸入八旗城外營房通融居住覈議具奏○丙申免四川生番滋擾之馬邊廳額賦○辛丑免河南教匪滋擾之唐縣等十九州縣並供應軍

需之南陽等二十一州縣通賦十分之五○召姜開陽來京以襄

行簡署福建布政使

前任江甯布政使

○調溫承惠爲河南布政使方維

甸爲陝西布政使○丁未諭顏檢奏請將三河縣知縣張力勤調補武清縣一摺已批交吏部議奏矣閱其摺尾有會同兼管順天府尹戴衢亨等恭摺具奏之語本日召見軍機大臣面詢戴衢亨據稱並未知此事可見外省於會銜具奏各件並不事前咨商僅於陳奏後關會實爲相沿陋習此等調補人員本非迫不及待之事既係例應會銜奏請自當將人地是否相宜彼此詳細公商以昭慎重况奏調之員若列名會奏之人竟不與聞其事將來設遇所保非人自當一律交議徒代他人任咎則會銜一節不幾成具文耶著通諭各督撫嗣後遇有彼此會銜及會同府尹河督漕督學政等衙門具奏事件總當先期知會公同商定俟有回文始行

具奏儻應會不會或僅於事後關會者卽著應行會銜之員據實
參奏交部議處以杜專擅之弊○庚戌諭額勒登保奏親督官兵
勦賊殲斃緊要賊目見赴東川趕勦另股賊匪緣由一摺覽奏欣
慰齊國典一起零匪百餘人經官兵追勦緊急又分三股奔逃經
額勒登保親督官兵並分派將領跟蹤搜捕均有斬獲將賊目齊
國典僞元帥靳思慶僞先鋒路紹成殲斃所辦好自上年奏報截
定以來賊匪著名首逆均已殲斃惟齊國典一犯前曾隻身潛匿
繼又結夥奔逃展轉稽誅今臨陣殲斃是從前未獲兇渠實無一
名漏網指日卽可全數廓清額勒登保前因冒昧陳奏善後事宜
干與地方事務曾降旨將伊革去御前大臣並紫纓稍示懲儆嗣
伊陳明實係伊一人主見並非聽信地方官懇懇且伊於外省地
方情形本不甚熟諳自經朕訓飭以來甚知感奮親督官兵認真

起勦將緊要賊目盡數殲除實屬可嘉額勒登保著賞還御前大臣並紫纁用昭優獎遊擊馬成林帶同弁兵入林投捕使齊國典無路可逃跳崖跌斃實爲出力著交部議敘其硃筆圈出之把總毛三貴兵丁陳玉奉軍功熊鳴鳳余貴均著加恩賞戴藍翎以示鼓勵○以岳起署禮部右侍郎汪志伊爲江蘇巡撫原任福建巡撫○丁巳增設河南荆子關千總二把總三裁馬兵百四十名改設守兵

○戊午德楞泰奏擒獲首逆趙聰覲得旨嘉獎

六月丙寅諭國家承平不忘肄武每歲木蘭行圍簡蒐軍實兼以綏懷藩服我 聖祖仁皇帝在位六十餘年著爲恆典雍正四年

世宗憲皇帝諭旨以校獵講武一事朕年來未一舉行欲俟經理政事悉皆得宜卽富於農隙之時躬行獮狩之禮仰見 垂諭諄諄雖未及親舉行圍而訓練滿洲之意未嘗一日忘也 皇考

高宗純皇帝敬承

世德每歲舉行秋獮大典自平定西域以來

新疆諸部絡繹來庭每於山莊展覲

聖製避暑山莊後序以後

世子孫當毋忘

家法後人如忘此言則與國休戚之大臣以及

骨鯁忠直之言臣隨時進諫

訓詞肫摯不啻面命耳提朕纘紹

丕基若於舊典竟不率由蒙古諸藩王及新疆諸部不加款洽

是不能仰體

祖

考之心以爲心實愧且懼且朕日以肄勞講

武爲訓而近日八旗官員於騎射尙多不能嫻熟若竟停止行圍

伊等更日事恬熙漸忘本務何以仰承

聖訓著將此旨宣示俾

共知朕意

○丁卯增設滿洲日講起居注官二○癸酉諭軍機大

臣等貢楚克扎布奏撫恤青海蒙古並見在辦理情形覽奏俱悉

貢楚克扎布以野番强悍非僅以空言懾服勢須天兵臨巢伊等

方知震懼所見亦是惠齡係該省總督西甯旣須用兵自應親往

督辦著卽馳赴該處與貢楚克扎布都爾嘉等會籌熟商於就近
營分調撥官兵一二千名以張聲勢如尙覺不敷卽酌量加增或
揚言大兵數千卽日前來亦無不可總須令聲威壯盛使野番聞
風惕息雖不犁庭掃穴殲戮無遺亦必令將兇犯並所搶牲畜贓
物早行獻出真心畏懼持呪具結再不敢復圖搶掠方爲一勞永
逸之計蘭州省城不可無大員彈壓臬司蔡廷衡於惠齡到後卽
令回省辦理地方事務○戊寅諭向來 皇后出入均派內務府
大臣一員帶領豹尾槍扈從此次隨朕巡幸轉無扈從之員殊非
體制嗣後 皇后行營俱著派內務府大臣一員帶領豹尾槍扈
從著爲令○額勒登保奏生擒戕害穆克登布之首逆熊老八得
旨嘉獎○甲申諭據理藩院轉奏喀喇沁之扎薩克頭等塔布囊
喇特納濟爾第呈稱丹巴多爾濟之祖母和碩格格冰霜持節見

已八旬懇請旌表等語和碩格格係鎮國公弘昉之妹指與額駙僧衮扎布未婚守節今年逾八旬撫養子姓五世同堂良爲昇平祥瑞光耀宗支甚屬可嘉除加恩交該部照例旌表外御書扁額並由內賞給如意一柄紗段十八匹派散秩大臣松齡馳驛送至游牧處所頒給以示朕嘉勵貞操篤眷宗支至意○戊子諭工部尙書彭元瑞學問素優供奉內廷三十餘年行走勤慎前以骸疾艱於動履特兩次恩准展假令伊在家調理茲據奏宿痼已久時收時潰見在難望卽痊懇請解任等語彭元瑞賞假療治已及半年見既未能痊愈著照所請准其開缺俾安心調養至伊見充 實錄館總裁一切事例素爲熟諳伊在館總司編輯之任未便遽易他手著加恩留充 實錄館總裁俾得一手恭纂並著賞給尙書應領正俸銀米其總裁應得公費照常支領以示眷念卽

令其進城調養如果發疾就痊步履如舊仍當以原官起用○調
戴衢亨爲工部尙書以費淳爲兵部尙書陳大文爲兩江總督○
調初彭齡爲工部右侍郎轉姜晟爲刑部左侍郎調戴均元爲刑
部右侍郎由工部調○已丑諭前此豐耐國長阮福映表陳與安南搆
兵顛末係爲先世復仇恭遣陪价齎繳阮光纘遺棄舊頒敕印並
縛獻海洋逋盜恪恭請命朕鑒其航海輸誠特予嘉納曾經明降
諭旨將安南阮光纘獲罪覆滅及阮福映恭順出力緣由先行宣
示中外嗣節據該國長請錫新封陳明該國係先有越裳之地今
併有安南不願忘其世守願懇仍以南越名國經疆吏據情入告
部臣議駁以南越命名與徼外封域未協時念其敏關內附敬抒
悃忱命用越南二字以越字冠於上仍其先世疆域以南字列於
下表其新錫藩封並令廣西撫臣孫玉庭一面檄知阮福映一面

委員伴送齋進表貢使臣赴京諭其緩程行走以示天朝柔遠之意茲復據孫玉庭奏稱阮福映接奉欽定越南恩命倍深感激情辭歡忭出於至誠該使臣業已起程北上計七月下旬即可到京等語應卽加之寵命封爲越南國王所有應行頒給該國王印信敕書等件著各該衙門查照定例先期豫備並著欽天監衙門於頒行時懋書內將安南二字改爲越南永遵正朔至將來冊封時著派廣西臬司齊布森將新頒敕印帶同來使齋捧出關前往宣示詔旨俾該國王長承恩眷世守勿替將此通諭知之○壬辰命貴州士民被苗匪戕害者附祀昭忠祠